

菽莊三九雅集詩錄



辛酉重陽爾嘉以菽莊三九雅集徵海內詞壇大作先後得詩一千三百餘首爾嘉與諸社
侶循環披誦自春徂夏隋珠楚璧美不勝收爰編甲乙畧分次第並以甲選諸作付諸排印
以廣續墨緣時壬戌端午菽莊主人林爾嘉識

菽莊三九雅集徵詩啟

菽莊枕山負海自癸丑落成今九年矣每歲重九菽莊故事觀潮之樂勝於登高同社諸子謂主人曰今年九月九日適符三九之數復與三十慶節相後先何其不謀而合也於是集吟侶賞佳節爲三九之會觴詠於菽莊之藏海園焉園有眉壽主人之小名也軒曰談瀛有樓曰半樓長虹前亘爲四十四橋上有疊石曰枕流臺曰觀釣曰觀濤亭曰千波曰渡月倚山者爲真率亭由藏海園而左曰補山園室曰蕙香主婦之字名也園有十二洞天上有吾廬下有池爲上下池有亭曰梅亭旁有竹井前爲聽潮樓爲小板橋爲草閣爲蘆溆旁爲止水閘上有亭曰拜石臺曰晚對繞園徑者爲九曲廊圃曰菊圃畦曰菜畦塘曰荷塘有灣曰碧石灣溝曰浣花溝灘曰白沙灘是日設百福闢以藏海園觀潮及園中諸名目爲題分配詩古文詞各體拈得題者按體分撰計到會者共得八十一闕又適符九九之數以三九而成爲九九則引而伸之觸類而長之從此菽莊故事觴詠之樂正無窮期也所冀海內吟壇相與廣續騷雅卽以是爲典實錫之珠唾大壯園林景色異時當裒輯成集與乙卯歲之

虞美人課丙辰之黃牡丹已未之七夕四詠聞七夕之乞巧廻文庚申之帆影詞諸杰構輝
映後先公之同好焉海天引領邛須我友無任拳拳

菽莊主人林爾嘉謹啟

辛酉重陽菽莊三九雅集

陳還爽

江南天醉感故國之河山林下風高守勝朝之牒牒故或有換裝金粟歸築玉山草堂晞髮西臺來主月泉汐社扶持風雅卽所以培植綱常也予本兵火餘生供文字清役效丈人抱瓮藉悟息機觀天女散花未忘結習絕笑魚龍曼衍時亦作戲逢場生憎鷄犬喧豕自閉門索句不見白衣送酒望眼欲穿忽聞青鳥傳書私心竊喜寸緘折後珠玉同珍一序昭然園林如繪山公啟事默契四海神交劉郎題糕已播一時佳話菽莊先生別墅落成計九年於茲矣適逢重九之日廣招觴詠此三九雅集之義所自昉耳夫海濱避地長作玩世寓公天下知名爭說留司中隱乃復因樹爲屋埋盆作池結構拂水之莊別求清淨彷彿商飈之館弗事紛華是知三脊取茅此地不妨蓋頂爲計十年樹木異時倏已成陰是日也景物清佳意興逸雋追漢上題襟故事客龍山落帽嘉辰北海尊開仿洛下耆英之會東籬花好照陳芳主客之圖堂啟聚星白戰則不持寸鐵門高平棘霓裳則同詠衆仙主人笑口頻開道顏自

悅風流富貴都歸鷺鳥散人眷屬神仙更得鷗波隱趣從此一樓湖海望益則徑闢
三三斗酒歲時消寒則圖披九九予識荆有素敢持布鼓而過雷門學杜未工聊答
尺書以通錦水此以當古人木李幸勿嫌明日黃花也

龍門史筆真好奇寂莊作事亦如之平生每自出新意古所未有能獨爲成婚歷年已三十
隔海猶及徵吾詩又開雅集曰三九賡酬賓客多文詞是日勝會惜未與事後聞之猶軒眉
懸知莊中風景足亭樓臺榭光陸離望湖最上備滄趣錢塘勝概饒於斯一花一石善位置
此中經緯存良規群疆水繪不專美甌香濤園難勝茲落成僂指已九載攸居攸芋無弗宜
適逢重九風日美黃牡丹花開滿枝主人好客本天性對此良辰神益怡一時壇坫推祭酒
晉安風雅歸主持襟期一似盧雅雨四海名下多相知世間富貴亦多有往往氣爲居所移
玉堂金屋極奢侈能受清福曾伊誰惟公忘分樂天命忼爽不惜草堂資年來著作哀成集
海內早共瞻光儀我持一句爲公誦風流儒雅是吾師

夫裴公綠野誇昔年選勝之遊崔氏藍田勸今日盡歡之醉侈亭臺之壯麗結構玲瓏招裙屐以翱翔莊諧難遂良以名區足樂佳節難逢宜播詠歌藉攄懷抱然或但論買夏滋騰笑於山靈好作悲秋強寬懷於詩老未有疏泉疊石賦高庾信之園人傑地靈序合滕王之閣如辛酉重陽菽莊雅集之盛者也菽莊主人抱吟風弄月之才據帶海襟山之勝宗尙不矜乎莊老唱酬常結乎裴王開北海之清尊招邀上客關東山之別墅陶寫中年其園則左署補山右顏藏海梅亭影逗菊圃香霏廊屈曲而螺旋橋蜿蜒而虹亘臺登拜石仿韻事於襄陽軒啓談瀛蒐奇聞於海客白沙灘外蘆溆迴環碧石灣頭荷塘邐迤凡茲勝概足稱幽棲那須紙閣蘆簾諧德耀百年之偶儘有銀山雪練壯枚乘八月之文蓋其歲以重陽觀潮於此故事也亦美談也今者適際佳辰更修夙約溯草堂落成之日寒暑倏其迭更嗣蘭亭修禊之風少長依然咸集何惜十千之價酒舊藏醅特標三九之名花新翻樣是日也襟裙霧合翰墨雲飛堆盤有銀杏石榴聯席盡文龍詩虎認取圖分百福更無煩請試他題由來

緣訂三生才得此蔚成嘉會是豈特栽萸作佩屑米爲錢沿節物之成模標雅人之
深致云爾哉僕慚頑質莫踐靈修撫蟹菊以凝思託鹿蕉而馳夢雲山異地尙願作
投名入社之人風雨滿城幸不逢敗興催租之吏敢效蛙吟奏響興起聞風如容雁
贊通忱綢繆有日

開尊滿酌茱萸酒悶欲聯吟召良友海上傳書一鶴來南天近局君知否菽莊林氏有名園
壇坫稱雄馳譽久今秋文讌勝尋常園闢九年日重九觀濤亭上飛吟箋筆花亂挾驚濤走
詩成草木頓生輝千枝萬枝菊稱壽人生行樂能幾何我未列坐亦頰首從來地勝以人傳
天貺茲園意良厚主人豪氣兼俠腸塵外幽棲挈佳偶輞川幅幅畫圖開布置經營煩妙手
識得胸襟邁等倫浮雲世事拋蒼狗但期高會盛年年風雅林泉長不朽登高有客矜美談
記取歲星在辛酉

朱家駒

菽莊主人今之偃佺儔所居枕海靈異同十洲吞若雲夢八九廣園起納山一拳藏海猶一

甌此中靈木瑤草不知數大廈雲構天半森瓊樓長虹前亘四十四橋臥亭臺倒影危截滄
波流觀濤垂釣濠濮企莊惠渡月凌波更招嫦娥游右海左山汪洋忽竈從十二洞天一一
仙宮倖神僊眷屬於焉共栖止補天手段還補崑崙邱上池玉露下池功德水吾廬寧靜梅
竹枝連樛板橋草閣蘆溆閒點綴心如止水拜石顛相求晚對蒼茫循廊步九曲菜畦菊圃
在在供清幽白沙碧石池荷相映帶浣花結構恰好環溪溝主人眉壽躋堂來獻酬主婦在
室蕙香蘭玉稠綵衣成行繞膝聲怡氣金壘玉觴祝添海屋籌園成九載更逢九月九不用
龍山落帽登高愁君不見海潮十萬軍聲起拍天無岸鼇鼉與沉浮宇宙大觀浩淼不可極
扶桑倒景滅沒隨波鷗蓬萊方丈圓嶠亦幻耳蜃樓海市一氣空悠悠主人置酒授簡進客
激清謳安排玉簫金管坐兩頭長箋短吟滿壁未云足更著珊瑚鐵網宏羅搜笑余江郎之
筆老已禿大江南北興發吟高秋聞聲相思夢入鼓浪嶼囑付鱗鴻將我式詩當蹇修獨惜
三千里外綿邈隔滄海何時萍水慰吾一識韓荊州

沈眉

君不見岳陽之樓臨洞庭夏水欲滿君山青滕王之閣俯江沚暮煙欲凝西山紫年來都在
烽烟中劫火一過雕欄空江湖滿地干戈起雖有勝跡淹蒿蓬吾聞海上有三山遠在虛無
縹緲間凡夫望洋不得到祇有仙人相往還又聞桃源咫尺近不知有漢况魏晉一自白雲
洞口封落花流水津誰問何意天南起菽莊園亭結構疑仙鄉主人好客客好事年年佳節
一詠觴今年月日符三九主人主婦謀斗酒藏海園中約觀潮八十一客來先後園中名勝
山水兼詩古文詞各體拈此後重陽徵典實菽莊韻事應新添欲往從之苦無路長風大浪
海難渡主人多情歌邛須魚腹一緘通尺素令我追憶延平王大開賓館招流亡至今猶號
思明縣其人大都慨以慷一識荊州空有願七字詩成且寄遠不爭盧後與王前聊當他年
相見券

郭慶仁卿

莫問桃花源漁人當時亦茫然海濱有林叟詩名傳播遍宇宙林叟林棲愛林泉避世遯迹
藏海園重陽故事值三九好結翰墨三生緣我昨披圖窮島嶼一夕魂夢至其處花亦向我

笑鳥亦向我啼主人高臥湖海氣豪邁直與元龍齊觀釣石臺上從容登丹梯前亘四十四
長橋如虹霓銀屏珠箔迤邐處洞天十二神仙府謠瀛軒兮聽潮樓浣花溝兮水悠悠路灣
灣兮碧石泉涓涓兮枕流菊圃竹井梅亭荷塘曲廊洞房補山蕙香眉壽主人之小字曠達
卽以名其堂山爲襟兮海爲帶中有一人悲歌而慷慨招吟侶兮瓊筵開詩之人兮紛然來
旣拈題以分詠更命酒而舉杯藉一時之清興抒滿座之雅懷及時行樂當如此吟風嘯月
吾曹事豈期覺來雲山遙且喜十萬長纒腰欲來卽刻命輕舸會當乘風破浪行萬里入座
一笑拈吟毫

我園主人

去年消夏鷺江來西風吹夢乘舟回主人笑我歸何速不能留待重陽杯今年又到重陽節
吟樽不爲登高設主賓循例爭觀潮龍山往事何須說眼前滄海變桑田名園猶記落成年
光陰彈指逝川迅九度談瀛開菊筵海內共和已十載十月十日明朝屆三十節與三九逢
天公若爲巧支配我君風雅好談詩大集吟朋建鼓旗梁園賓客盡英俊文采風流盛一時

八十一人誇勝友嗟予遲暮空搔首自揣我僑厠其間九九圖中增一醜諸君憶我若爲情
我諸君心更傾於今耆舊少新語海上誰爲牛耳盟曩會不及茲會盛君眞愛才直如命未
知再續是何時老夫還擬重遊慶

天 遺

中原板蕩遘陽九佳處園林集遺耆菽莊落成垂十年及取重陽來置酒登高海島無故事
此樂古來初未有借題言數用乾元何似頌郎列三垂依稀水患溯堯年別業經營從亂後
寒砧木葉苦相催風景入秋愴回首黃花開日未成旬名句至今在人口感時觸物託哀吟
命隻詩人傷不偶寓公身世本蕭瑟投老南荒罷飢走他鄉佳節恐虛過高會觀潮召賓友
命名畧擬消寒圖座人竊比香山叟以詩紀事徧流傳勝地良辰俱不朽我聞此舉三太息
風雅銷沉斯亦久先朝文物蕩無存人間不見題糕手新來海上聚名流杖履過門動星斗
山林事業屬吾曹欲往從之嗟老醜官歸未辦草堂費日向柴門共厮守滄桑幾度白人頭
歌哭歲時聊擊缶何當散髮弄扁舟汨沒煙濤洗塵垢海山歸處有前期一去好尋耦耕耦

吳樵笑

共和十年歲辛酉始事菽莊溯在丑屈指落成今九年藏海園中又重九藏海補山萬狀奇
包孕三無截九有主人主婦兩風流室曰蕙香堂眉壽長虹前亘卅四橋半樓更出談瀛右
觀濤渡月枕流臺千波睥睨釣魚叟額題三字真率亭八面空明倚邱阜洞天十二着吾廬
下有方池廣五畝池光上下二氣分竹井梅亭扼其肘板橋草閣蘆溆歧聽潮止水百靈守
拜石俯仰晚對閑九曲廊前延伫久菜畦菊圃間荷塘野意十分納戶牖白沙碧石浣花溝
一片清涼富消受賞心美景值良辰衆皆登高此獨否海天莽莽九秋濤儼然太華峯頭走
觀潮樂處勝登高故事鷺門八回首林亭正序永和年樽壘滿置孫陵酒這回雅集盛名流
珠玉滿前互師友江山摹繪三影詞壇站抗衡八叉手崔九陸九歐九才一時盡逐逋仙後
藏圖百紙各分題九九上圖數非偶定知此會水莊中佳作唱酬類瓊玖茱萸螃蟹物尋常
解用都成千金帚卅六鴛錦繡成文七四驪珠探在口靈心九孔鍼貫穿詞藻九苞禽天糾
琅璈九氣盆三纈色色聲聲啟門吐我慙狂杜三生名陽九命窮瀕老朽當年摸索落成詩

陋劣祇應供覆瓿既思便道訪林宗遇雨不行辜剪韭佳題節物黃牡丹巨鐘媿以寸莛扣
邇來東西南北人飢驅輒作喪家狗羗村三首失歸謀湘水九章成夢誘今年九月歐浦遊
故山又復重陽負湖心築社纔七年秋稷盛筵三度狃因羨菽莊賢主人福慧生來得天厚
揆張佳日倡風騷不效南山歌拊缶緬茲高會黃花前雕肺鏤肝一獻醜吟成三十九韻詩
倘換兵厨酒百斗

沈紹李

天風浪浪海水蒼仙山樓閣蓬萊鄉中有幽棲號菽莊海天萬象園中藏朱窗碧檻琉璃光
吐納沆瀣恣徜徉年年佳節過重陽登高一繫茱萸囊潮音萬派來扶桑波詭雲譎騰千櫓
蜃樓螺嶼瞥眼爲低昂助以詩魂酒魄天地之清商今年九月九日盛會喜非常屈指園成
癸丑歲九將適符三九之數爭賞良辰良復與國慶三十節日先後呈嘉祥主人好客羅酒
漿羣介眉壽君子堂談瀛氣逼垂虹長四十四橋疊石浮飛梁枕流觀釣波濤揚倚山渡月
眞率亭翼張補山一角山如妝王母璇室廠蕙香上有洞天十二遙與吾廬望下有池水漱

鹽上下飛鴛鴦梅竹清娛井欄旁板橋草閣秋風涼花溝迤邐街荷塘漱蘆瑟瑟天微霜誰
云九曲廊閒三徑荒晚對圃鞠畦菜流孤芳心如止水心相忘有時拜石狂其狂白沙碧石
位置天然常更繞佳色籬花黃一年好景記且詳俯仰坵壑皆文章拈題圖分百福忙八十
一家筆陣相張皇三九九九數交相一詠初成揮一觴從此觀潮故事無復數泉唐况有清
辭麗句浩如千頃波汪汪主人逸興更逐雲游颺詩徵四海萬里隨雁翔贈我雲水洗我觥
體腸遙繼羣仙同日歌霓裳才華多少搜盧王手持玉尺憑君量吁嗟濁世憂患場瘡痍滿
目中心傷太平難覩嗟望洋恨無長矢注天狼空憐大國美哉乎決七久使大雅不作書謬
而詩亡何幸菽莊吟社清譽彰能令宣和文物盛明昌振衣獨立千仞岡名流咸集少長行
西園東壁敷琳琅風流那惜黃金償請看他日瑤編錦製輝青緇願與香山月泉之樂樂無
央

酒 句

蕪城歌吹蓬榛沒金谷胭脂笑啼歇樓臺委土綺羅空世變滄桑驚骨突洛陽耆老壽而臧

滕閣賓僚美且良勝地雅人兼韻事千秋畢竟在文章林園一粟能藏海語大而容天亦載
佳會剛逢慶節三廣輪本較須彌倍觀濤渡月縱談瀛無數虹腰上界橫繞室應題香祖額
登堂已記主人名主人年少耽風雅絕好莢裘供游冶今年循例啓瓊筵菽莊特集吟秋社
曲廊小閣雜亭臺仙館神廬蕩蕩開未許平泉誇竹木疑從水繪合尊壘東南壇坫名流貴
鷗鷺閒情鵬鶚志拈題惆悵對張三入座從容煩劉四帽簷挿菊手持螯南郭先生彭澤陶
尚有吳公能說餅好催劉子去題糕美人才士文明選醉後魚龍任漫衍不嫌紗帽挂高枝
更裂羅裙書大篆萬媚千悅生百歡何妨巾幘勝衣冠人間意氣消真率此會休教俗眼看
老夫新毀防風骨寸步難移不可越遙聞雅集廣徵題疑是九梯深靜窟人事雖忙我自閒
天然雅俗各分班他年幸見林和靖願守孤山不願還

居庸過客

邊雲蒼莽極西北秋深不見黃花色萬里無人送酒來酪漿飲罷穹廬匿盛傳高會啟東南
上客知名盡駐驂對影成三人九九占爻得九數三三芳園雅擅林泉美聯袂觀潮隨坐起